

**Wednesday, September 24, 2025**

**Time - 2:30pm - 2:35pm**

**AKASHVANI AIZAWL**  
**REGIONAL NEWS UNIT**

**SWACHHATA HI SEVA**

Sorkar laipui hmakakna hnuaia mipuite hnena faina pawimawhzia inzirtirna, Swachhata Hi Seva chu ram pum rualin Mizoram hmun hrang hrangah pawh kalpui a ni.

Kum 2017 atangin kumtin chawlhkar 2 chhung ram pumah hman thin a ni a, India hnampa Mahatma Gandhi piancham October ni 2-ah a kharna hun hman thin a ni a, Mizoramah pawh ram pum rualin kumtin hman ve thin a ni a, he hmalakna hi Swachh Bharat Mission hnuaia neih thin niin, Ministry of Housing and Urban Affairs leh Department of drinking Water and Sanitation hnuaiah khawpui Urban leh thingtlang Gramin kalpui a ni a, Mizoramah chuan khawpui chu UD&PA in a chang a, thingtlang chu PHE department in a chang thung a ni.

Kumtin thupui hrang hrang neih thin niin, kuminah chuan "Swachhotsav" tih thupui hman a ni a, hemi awmzia chu vantlang mipui punkhawmna kut hmanaah te bawlhhlawh a tlem zawk nan leh bawlhhlawh te felfai taka thehthang a nih theihna tura hmalakna a ni.



**GST REFORMS**

Sorkar laipuiin GST rate a siamthatnaa mi harsa zawk ten an lei theih tur chhiah a ti hniam a, mihring hriselna atana tha lo, vaihhlo leh zu kaihhnawih atanga chhiah lak zat a ti pung chu tha an tih thu mithiamten an sawi.

Akashvani Aizawl zawhna chhangin Pu Hrangtawna IRTS (Rtd) chuan sorkar laipuiin GST a ennawn chu tha a tih thu sawiin, tunhmaa GST rate a san avangin mipuiten chhiah an chawi tam thin lutuk a ti a, nitina mipui mamawh bakah damlo harsa zawk te tana damdawi pawimawh, life-saving drugs ah te chhiah lak a ni tawh lo chu tha a ti hle tih sawiin, vaihhlo leh a kaihhnawih bakah zu atanga chhiah lak zat chu zaa 40-ah tihpun a ni a, mi rethei leh mi harsa zawkin an lei ve theih car tenau leh two-wheeler atanga chhiah lak zat tihniam a, car manto leh changkang zawkahte chhiah a tisang chu tha a ti hle a, ram tan pawh tha hlea a hriat thu a sawi a ni.

***Byte: Pu Hrangtawna IRTS (Rtd)***

Pu Hrangtawna chuan tunhnaia sorkar laipuiin GST a ennawn thut chu US-in chhiah chungchanga India a nawr nasat lutuk vang nia a hriat thu a sawi a, India chuan kum 2047-ah chuan khawvela economy chak ber nih tuma a beihna kalzelah Prime Minister Narendra Modi pawhin chhiah lak dan chu One Nation, One Tax tih sawiin, state tinah ang khat veka chhiah la turin a ti a, hei hi Mizorama sumdawngte leh thil leitu mipuite pawh tha taka kalpui turin a chah a ni.



**MNYF PRESS CONFERENCE**

MNF Thalai Pawl chuan July Ni 7-a Ministry of Tribal Affairs-in Mizoram sawrkar hnena tribal scholarship cheng vbch 50 chuang a pek tawh laia vawiin thlenga zirlaite hnen a la thlen loh chungchangah ZPM kaihhruai Sorkar chu mawhphurhna la turin an phut.

Vawiina Aizawl Press Club-a thuthar thehdarhtute an kawmnaah, MNYF Vice President Lalnunmawia Pautu chuan kum 2023 atanga kum 2024 inkarah zirlai 3981-in Scholarship an la dawng kim lo leh sawrkar kum kalta 2024 atanga 2025 session post matric zirlai 28459 leh pre-matric 8788-te'n scholarship an la dawn chhan chu Mizoram Sorkarin Scholarship Scheme chu a Department changtute rawn lovin SNA SPARSH MODEL ah a lo ziahluh vang a ni tih sawiin hei hi SASCI loan a puk tam duh vang nia sawiin, ZPM sawrkarin sum puk tam na atana SNA SPARSH MODEL-ah zirlaite a dahkham chu zirlaite a ngaihsak tawk loh vang leh sorkar sum enkawl dan an thiam tawk loh vang niin a sawi a. Kumin July Ni 7 khan Ministry of Tribal Affairs chuan Mizoram sawrkar hnenah cheng vbc 50, nuai 42, sing 8, sang 1 a rawn pek tawh laia vawiin thlenga zirlaite hnen a la thleng lo chu hriatthiam har an tih thu sawiin, ZPM kaihhruai Sorkar chuan a lo tihdik lohah mawh lain Zirlaite Scholarship pek vat a nih theih nan tihfel ngai te tifel zung zung turin an phut tih a sawi.



**UD&PA MINISTER**

UD&PA Minister Pu K. Sapdanga’n Aizawl khawpui traffic zam tih ziaawm nan kawng tih zauh belh bakah mipuite him taka an chet vel theih nana kalna nuam, footpath tha leh changkang zawk siam mek anih thu a sawi.

He thu hi vawiina Urban Development & Poverty Alleviation Department hnuaia hmalakna hrang hrang thlirhona ah sawiin Temple Square leh Vaivakawn inkar kawng thawm thatna tura ruahmanna hrang hrang sawi ho a ni a, Minister chuan tun dinhmunah Temple leh Vaivakawn inkar kawng bakah Bawngkawng leh Kulikawn inkar kawngte thawmthatna tura ruahmanna siam mek a nih thu sawiin, ruahmannate a hlawhtlin thuai theih nan khawtlang hruiute chu theihtawp lo chhuah tur leh kawngpui ti hnawk zawnga lirthei dah thinte vil uluk lehzual turin a ngen a ni.



**PHE MINISTER**

Nimin khan PHE Minister Prof. Lalnilawma chuan Union Minister for Jal Shakti Pu CR Paatil chu a chenna inah kawmin Mizoram mamawh hrang hrang a thlen.

Prof Lalnilawma chuan Jal Jeevan Mission hnuaia hnathawh zawh tawh bill tang rei lutuk chungchang sawiin pe chhuak thuai turin a ngen a. Mizoram chu tlang ram, ruahtui tamna a nih avangin a remchanna apiangah ruahtui khawlina siam a, tuihna siam thei tur kawr leh tlang kar khuahna siam a pawimawh tih sawiin hmalakna tur project PHE Department-in a thehluh tawh pawh pe ngei turin a ngen nghal bawk.

Minister Pu CR Paatil hian DPR thehluh tawh chu lo zirchianga a tih theih dan tur ngaihtuah turin official-te a hrih tawh thu leh a lo bawh zuipui zel tur thu a sawi a ni.



**SEVA PARV**

Mipui rawngbawl leh sorkar inrelbawlina tha tih thupui a hmangin Prime Minister Narendra Modi sorkarna hnuaiah kum kalta chhung khan hmasawwna kawng hrang hrangin kalpui a ni a.

Tun tum Seva Parv hunah chuan kum 11 chhungin Prime Minister Narendra Modi sorkarna hnuaia hmalakna te han tarlang ila..

Prime Minister Narendra Modi sorkarna hnuaiah semiconductor in hma a sawn theih nan hmalak a ni a. Kum 2021 a semiconductor hawn a nih atangin India Semiconductor Mission chuan cheng vbch sing 7 sang 6 chuang thawk chhuak tawhin, semiconductor siam chhuah kawngah hmasawwna tam tak a thlen a ni.

